

1. Upper Assam-a Rel kawng chhia vanga Hmarchhak state hrang hrangten tuialhtheia harsatna an tawh chuan ziaawm lam a la pan thei chiah lo.
2. Mizorama tleirawl leh rawlthar 14,170, ruihhlo laka fihlim turin an intiam tawh.
3. Lok Sabha inthlanpui thawh li-na, naktuka nei turin ruahmanna peihfel a ni.
4. Israel sipai-ten Gaza khawpui chhim lamah beihpui thlak an tum avangin Rafah-a chengte insaseng turin an hriattir nawn leh.



POL Problem

Upper Assam-a Rel kawng chhia vanga Hmarchhak state hrang hrangten tuialhtheia harsatna an tawh chuan ziaawm lam a la pan thei chiah lo.

Aizawlah pawh vawiina petrol pump inhawngahte tuialhthei lak tum an la intlar thui hle niin kan Corr. chuan a sawi a. Aizawl Treasury Sq-a Mizofed petrol pump Manager Pu Rohinliana chuan Diesel chu Silchar bul Monirbond Oil Depot-ah a thlen tawh thu sawiin, petrol phur turin tanker engemaw zat Guwahati-ah an chhuk thla, a ti a. Nizan khan Mizofed petrol pump Treasury square-ah petrol litre Sing 2 leh MINECO pump-ah litre Sing 1 Sang 2 an hlan thlak thu sawiin, vawiin tlai dar 5 thleng khan inhawngin chuta petrol dinhmun azirin naktukah ‘free sale’ chhunzawm tur nge coupon neite chauh tan hralhchhuah tur tih thutlukna an siam ang a ti a, naktuk zanah Vairengte atangin tanker anrawn thlen an beisei thu leh Diesel erawh an ‘free sale’ reng tur thu a sawi bawk.

Hauva petrol pump chuan petrol litre Sing 1 Sang 2 neiin naktuk atangin an ‘free sale’ ang a, diesel erawh an nei rih lova, Zangena petrol pump-ah diesel an ‘free sale’ mek a, vawiin tlai hian petrol litre 11,000 arawn thlen an beisei a, arawn thleng a nih chuan an zuar chhuak nghal dawn a ni.

Hetih lai hian Rel kawng hi siam that a nih tawh avangin reiloteah tuialhthei lak luh pawh a inphaman chho tura beisei a nih thu Mizoram sorkar chuan a sawi a.

Sorkar thuchhuah tarlan dan in Mizoram aiin Tripura-in harsatna an tawh nasat zawk avangin rel-in tuialhthei a phurh hmasak pahnih chu Tripura tan zuah phawt a ni a, a pathumna chu IOCL hotuten Mizoram tan ni se, an ti a. Tuialhtheia harsatna tawh mekah mipuite lo chia lo turin Food, Civil Supplies & Consumer Affairs Department chuan a ngen a. Petrol pump thenkhat, harsatna remchanga laa a hlawma ‘black’-a zawrh tur lo pe chhuak thin an awm tih hriat a ni tih sorkar thuchhuah chuan sawiin hemi vil tur hian District hrang hranga FCS&CA Department, Deputy Commisisoner office leh SP office tangho te’n hma an la a, petrol pump-te CCTV footage thlengin en thin tur a ni, a ti.

Hetihlai hian Petroleum Entrepreneurs and Transport Union of Mizoram (PETUM) chuan Food, Civil Supplies & Consumer Affairs Department thuchhuah hi chhangelatin, thu hriatna rintlak leh chhui chianna awm hmasa loin petrol pump neitute vaukhanna niawm tak thuchhuah an siam a, an trade licence cancel-sak hial tura hma lak a tum chu hriatthiam har an ti tih thu a sawi.



Mothers’ Day

May thla Pathianni vawi 2-naa hman thin Nute hriatrengna leh chawimawina hun atana buatsaih ‘Nute Ni’ (Mothers’ Day) chu vawiin khan khawvel hmun dangte rualin Mizoramah pawh Chhandamna Sipai Pawl (The Salvation Army) chuan he ni pual hian hun an hman.

Mizorama Chhandamna Sipai Pawl Biak in tinah chaw-hma khan Thianghlimna Inkhawm neih a ni a. He inkhawmah hian Pathian thuchah ngaihthlak a nih bakah

lawmthu sawina leh kum 2023-24 chhunga Nu, boral tate s̄unna hun hman a ni a. Nute hnenah Pangpar hlan a ni bawk. Chhandamna Sipai Pawl te hian ‘Nute Ni’ pual hian zanin inkhawm thleng hun an hmang dawn a ni.

Kum 1920 khan Salvation Army rorelna sang International Management Council chuan an Kohhran tan ‘Nute Ni’ chu High Day- ah a pung a India ramah pawh kum 1920 atang hian ‘Nute Ni’ hi hman tan a ni.

Kum 1914 May ni 8 khan USA President, Woodrow Wilson-a chuan Nute Ni hi rampuma hman a nih tur thu leh sawrkar building-ah te an ram flag tar turin thupek a chhuah a. Kum tin May thla Pathianni vawi 2-na chu khawvel ram dangte pawhin Nute Ni atan an hmang ve ta a ni.

<><><>

BCM

Kum dang ang bawkin Baptist tualchhung kohhran tin leh chhungkaw tin te’n naktuk atangin chawlhkar khat chhung Kristian Chhungkaw Chawlhkar an hmang leh dawn.

Hemi chawlhkar-a chhungkaw thu zir tur, Rev. L. Vanlalsanga ziak Kristian Chhungkaw chungchang, zirlai 6 awmna chu Headquarters atangin chhung tin daih sem a ni a. Zirlai bakah hian vawiin Pathianni chawhma inkhawmah kum 2024 Kohhran Ni pawimawh programme-a Kristian Chhungkaw Ni thupui dah sa, ‘Chhungkuaa Thlarau Thianghlim pawimawhna’ tih hmangin thuchah ngaihthlak a ni a. Zanin inkhawm thupui tur erawh chu Tualchhung Kohhran ten tha an tih angin an siam thung ang.

<><><>

FOUNDATION FOR DRUG FREE MIZORAM

Mizorama tleirawl leh rawlthar 14,170 te ruihhlo laka fihlim turin an intiam tawh.

Ruihhlo laka Mizorama fihlim theih nana hmalatu tlawmngai pawl, Foundation For Drug-Free Mizoram chuan vawiin chawhnu khan Aizawl Zuangtui Presbyterian Kohhran-a tleirawl inkhawm, Youth Christian Fellowship te chu ruihhlo that loh zia zirtirna an pe a. He hunah hian Dr. Donna Tochwawng chuan mihringin a hneh theih tawh loh chin a thlen chuan chu dinhmunah chuan a intulut fel tawh tihna a ni a; hei hi hriain taksa, rilru leh thlarau tichhe thei ruihhlo laka fihlim turin tleirawlte a sawm a. Miss Mizoram 2024 Runner Up Evelyn Zachhingpuii kaihhruiin tleirawl leh rawlthar mi 109 te chu ruihhlo laka fihlim turin an intiam a ni.

Foundation For Drug-Free Mizoram hian kum 5 chhungin Mizoram chhung hmun 72-ah rawngbawlna an kalpui tawh a, an rawngbawlnaah hian tleirawl leh rawlthar mi 14,170 te ruihhlo laka fihlim turin an intiam tawh a ni.

<><><>

CYBER CRIME

Cyber Crime Police Station (CCPS)-in kumin chhungin internet hmansual kaihhnawih thubuaiah mi 11 an man tawh.

CCPS hotute hnen atanga thudawn danin, kumin January ni 1 atanga tun thla ni 7 thleng khan thubuai 21 an ziak lut tawh a, hemi kaihhnawihah hian mi 11 an man tawh a. Heng thubuai an ziah luh zinga tam ber chu sum kaihhnawiha inbumna a ni a, a dawttu chu hursualna kaihhnawiha inbumna a ni a; a bak thubuai dang chu mi nihna ruksaka pawikhawih nana hman te, a neitu emaw a siam chhuaktu emaw phalna la hmasa loa video thehdarh thubuai te, hacking leh thubuai dangte a ni.

CCPS hian kum 2020 atanga tun thla ni 7 thlenga thubuai an ziah luh zawng zawng hi 288 a ni a; heng thubuai hrang hrangah hian mi 40 man tawhin, chung zinga mi 32 chu thiam loh chantir an ni tawh a. Hemi hun chhunga pawisaa inbumna thubuai an buaipuia sum an hmuh lêt chu Cheng vaibelchhe 1, Nuai 14, Sing 4, Sang 2 leh 303 a tling a ni.

<><><>

FIRE DAMAGES

Kumin January atanga March thla tawp thleng khan Mizoramah in kang 16 awmin kangmei vangin mi pahnihin nunna an chan.

Fire & Emergency Services-in a chhin chhiah danin chuan kumin kum tir thla thum chhung khan in kang 16 leh ram kang tum 33 a thleng a. Kangmei vanga thi pahnih awmin hliam an awm lo thung a. Kangmei-in thil a tihchhiat hlut zawng hi Cheng Nuai 670 Sing 8 leh 332 a ni a, bungraw chhe tur chhanchhuah zat chu Cheng Nuai 603 Sing 7 Sang 7 a ni.

Kum 2018 khan in kang 37 leh ram kang 56 awmin kangmei vanga hliam 14 an awm a. Kangmeiin thil a tihchhiat hlut zawng hi Cheng Nuai 924 Sing 3 Sang 3 leh 637 a ni a. Kum 2019 khan in kang 28 leh ram kang 16 awmin kangmei vanga thi pathum leh hliam pasarih an awm a. Kangmei thil tihchhiat hlut zawng hi Cheng Nuai 139 Sing 1 Sang 5 leh 930 a tling a. Kum 2020 khan in kang 37 leh ram kang 131 awmin kangmei vanga hliam pahnih an awm a. Kangmei thil tihchhiat hlut zawng hi Cheng Nuai 522 Sing 7 Sang 9 leh 768 nia chhut a ni.

<><><>

4TH PHASE LS ELECTION

Lok Sabha inthlanpui thawh li-na, naktuka nei turin ruahmanna peihfel a ni tawh a, State 9 leh Union Territory 1 huamchhunga Lok Sabha bial 96-ah zing dar 7 atanga tlai dar 6 thleng, vote thlak a ni ang.

Naktuka inthlan neihna tur zingah hian Andhra Pradesh-a seat 25, Telangana-a bial 17, Uttar Pradesh-a bial 13, Maharashtra-a seat 11, Madhya Pradesh leh West Bengal-a bial 8 ve ve, Bihar-a bial 5, Jharkhand leh Odisha-a seat 4 ve ve leh Jammu & Kashmir-a seat 1-te a tel a, candidate 1717 an awm a ni.

Lok Sabha inthlan rual hian Andhra Pradesh leh Odisha assembly thar din turin vote thlak nghal a ni dawn a, Andhra Pradesh-ah hian seat awm zawng zawng 175-ah vote thlak a ni ang a, candidate 2386 an awm a ni. Odisha-ah erawh chuan a thawh khatna, seat 28-ah vote thlak a ni ang.

<><><>

ISRAEL ISSUES FRESH ORDERS

Israel sipai-ten Gaza khawpui chhim lamah beihpui thlak an tum avangin Rafah-a chengte insaseng turin an hriattir nawn leh a, Israel hmalak dan hi khawvel ram hrang hrang-ten an sawisel nasa hle a ni.

Israel sipaite hian tunhnai khan mihring maktaduai 1 chuang chenna, Rafah khawpuia civil mite chu insaseng turin an lo hriattir tawh a, nimin khan hriattirna an chhuah nawn leh a, mi nuai 3 vel chu an insaseng tawh niin an sawi.

Israel thil tih dan hi Palestine mi ralatlante buaipuitu, United Nations agency chuan na takin a dem a, UN Relief Works Agency Commissioner-General, Philippe Lazzarini-an a sawi danin indo chhuah atangin Gaza Strip-a cheng civil mite chuan inhumhimna zawng mahse an hmu thei lova, Gaza khawi lai mah him a awmlo niin a sawi.

<><><>